

**A** *rubá*

**A** *ntaño*

## DERAMENTO DEN CHIKE

"Bini bendicionnan di mi Tata, y tuma posesion di e Reino, cu ta prepara pa boso for di fundacion di mundo. Drenta den alegria di Senjor pasobra mi tabatin hamber y boso a duna-mi di come; mi tabatin sed, y boso a duna-mi di bebe; mi tabata stranjero y boso a ricibi-mi; mi tabata sin panja y boso a bisti-mi; mi tabata malo of den prison y boso a bishita-mi. (Mateo 25)."

Solamente Dios por waak den curazon di hende. Solamente Dios por huzga nos. Asina nos a yega na e ultimo cambio cu nos ta menciona den e publicacion aki, un cambio di entierro catolico, proclamá den un carta pastoral di Mgr. Holterman, dia 9 di februari 1969. Eyden nos ta lesa entre otro:

"Segun un ley cu ta existi for di Aruba Antaño, cu Iglesia ta nenga cierto hendenan entierro catolico. Antes aya Iglesia lo tabatin su motibonán pa traha e ley aki. Pero nos a yega na e conviccion cu den nos diocesis, mescos cu den hopi otro diocesis, nos tin motibonan grave pa no aplica e ley aki mas. E motibo di mas principal ta esaki; ora hende no ta haya entierro catolico, fielnan di nos diocesis ta considera esey como un condenacion publico di e defunto, mientras su parientenan ta sintié como un berguenza cu ta cai riba henter famia, mientras cu nan no ta culpabel na conducta di e defunto. Nan ta haya cu Iglesia ta falta cu amor pa cu e defunto y su famia, si e nenga entierro. Cu tal opinion nos kier y mester tene cuenta.

Realmente esaki no ta intencion di e ley di Iglesia, cu nos a caba di mencioná. Al contrario. Ta imposibel cu Iglesia kier mantene un ley cu en realidad ta perhudica amor cristian.

Despues cu tabatin consulta di e sacerdotenan y hopi Consejo Parokial, cu a duna nan aprobacion, a dicidi di no aplica e ley ey mas. Esey kier meen, cu tur defunto cu pa medio di bautismo ta pertenece na Iglesia.